

# पतरस की दूसरी चिट्ठी

**1** यीशु मसीह के सेवक तथा प्रेरित शमौन पतरस की ओड़ तै उन लोगां के नाम जिन ताहीं पणमेसर तै म्हारै जिंसा ए बिश्वास मिलै सै। क्यूँके म्हारा पणमेसर अर उद्धारकर्ता यीशु मसीह न्याय पूर्ण सै।

**2**थम पणमेसर अर म्हारे प्रभु यीशु मसीह ताहीं जान चुके सो इस करके थारै ताहीं पणमेसर की कृपा अर अनुग्रह भोत ए घणा मिलै।

## पणमेसर नै म्हारै ताहीं सब कीमे दिया सै

**3**अपणे जीवन कै खात्तर अर पणमेसर की सेवा कै खात्तर जो कीमे हमनै चाहिये, आपणी दिव्य शक्ति कै जरिये उसनै सब कीमे म्हारै ताहीं दिया सै। क्यूँके हम उस ताहीं जाणां सां, जिसनै आपणी धार्मिकता अर महिमा कै कारण म्हारै ताहीं बुलाया सै। **4**इन्ने कै जरिये उसनै म्हारै ताहीं वे महान अर घणे कीमती बरदान दिए सैं, जिन ताहीं देण की उसनै प्रतिज्ञा करी थी ताके उनकै जरिये थम खुद पणमेसर की तरियां हो जाओ अर उस विनास तै बच जाओ जो लोगां की भूँडी इच्छायां कै कारण इस जगत म्ह स्थित सै।

**5**इस तरियां तै अपणे बिश्वास म्ह उत्तम गुणां ताहीं, उत्तम गुणां म्ह ज्ञान ताहीं, **6**ज्ञान म्ह आत्मसंयम ताहीं, आत्मसंयम म्ह धीरज ताहीं, धीरज म्ह पणमेसर की भक्ति ताहीं, **7**भक्ति म्ह भाई-चारे ताहीं अर भाई-चारे म्ह प्रेम ताहीं उदारता कै गेल्या बढान्दे चाल्लो। **8**क्यूँके जै ये गुण थारै म्ह सैं अर उनका विकास होण लागरया सै तो वे थारै ताहीं कर्मशील अर सफल बणा देवेंगे तथा उन तै थारै ताहीं म्हारै प्रभु यीशु मसीह का परिपूर्ण ज्ञान मिलैगा **9**किन्तु जिसमह ये गुण नीं सैं, उसमह दूर-दृष्टि नीं सै, ओ आन्धा सै। तथा ओ न्यू भूल चुक्या सै के उसकै पहल्ले पापां ताहीं धोया जा चुक्या सै।

**10**इस करके हे भाइयो, न्यू दिखान के खात्तर और घणा त्यार रहो के थारै ताहीं असलियत म्ह पणमेसर कै जरिये बुलाया गया सै अर छांटया गया सै क्यूँके जै थम इन बातों नै करो सो तो ना कहे भी ठोकर खाओगे अर ना ए पड़ोगे,

**11**अर इस ढाळ म्हारै प्रभु एवम् उद्धारकर्ता यीशु मसीह के अनन्त राज्य म्ह थारै ताहीं दाखल कराके पणमेसर आपणी उदारता दिखावैगा।

**12**इस्से कारण मैं थारै ताहीं, हालाके थम उन ताहीं जाणो ए सो अर जो सत्य थारै ताहीं मिल्या सै, उस पै टिके भी होए सो, इन बातों नै सारीहाण याद दुवान्दा रहूँगा। **13**मैं जिब लग इस काया म्ह सूं थारै ताहीं याद दुवाके चौकन्ने करदे रहण नै सही समझूँ सूं। **14**क्यूँके मैं न्यू जाणु सूं के मन्ने आपणी इस काया नै तावळा ए छोड़ देणा सै। जिंसा के म्हारे प्रभु यीशु मसीह नै मेरै ताहीं समझाया सै। **15**इस करके मैं हर कोसिस करूँगा के मेरै मर जाण के बाद भी थम इन बातों नै सारीहाण याद कर सको।

## हमनै मसीह की महिमा के दर्शन करे सैं

**16**जिब म्हारे प्रभु यीशु मसीह के समर्थ आगमन कै बाबत म्ह हमनै थारै ताहीं बताया था, फेर श्याणपत तै गढ़ी होई कहानियां का सहारा कोनी लिया था क्यूँके हम तो उसकी महानता के खुद गवाह सां। **17**जिब परम पिता पणमेसर तै उसनै आदर अर महिमा मिली तो उस दिव्य-महिमा तै खास बाणी प्रगट होई, “यो मेरा प्यारा बेट्टा सै, मैं इसतै राज्जी सूं।” **18**हमनै अकास तै आयी वा बाणी सुणी थी। फेर हम पवित्र पर्वत पै उसके गेल्या ए थे।

**19**हमनै भी नबियाँ के बचन पै और घणी आस्था होई। इस पै ध्यान देके थम भी आच्छा करण लागरे सो क्यूँके यो तो एक चाँदणा सै, जो एक अँधेरी जंगहा म्ह जद लग चमकण लागरया सै जिब लग दिन लिकड़े सै अर थारे हृदयां म्ह तड़के के तारे का उदय होवै सै। **20**किन्तु सारया तै बड्डी बात या सै के थारै ताहीं न्यू जाण लेणा चाहिए के शास्त्र की कोई भी भविष्यबाणी किसे नबी के खुद के बिचारां का नतीज्जा कोनी सै, **21**क्यूँके कोए माणस जो कहणा चाहवै सै, उसकै मुताबिक भविष्यबाणी कोनी होन्दी। बल्के पवित्र आत्मा की प्रेरणा तै माणस पणमेसर की बाणी बोल्लै सैं।

### झूठे मास्टर यानि सिखाणीयें

**2** जिसा भी रह्या हो उन सन्त जनां के बिच्चाळै जिसे झूठे नबी दिक्खण लागे थे, जमा उससे तरियां ए झुठे नबी थारै बिच्चाळै भी प्रगट होवेंगे। वे घातक धारणायां की सुरुआत करैगे अर उस मालिक लग ताहीं नकार देवेंगे जिसनै उन ताहीं अजादी दुवाई। इसा करके वे अपने तावळे विनास नै बुलावेंगे। **2** भोत से लोग उनकी भोग-विलास की आदत का अनुसरण करैगे। उनके कारण सच्चाई का राह बदनाम होवैगा। **3** लोभ के कारण आपणी बणावटी बातों तै वे थारै तै धन कमावेंगे। उनका दण्ड पणमेसर के जरिये भोत पहल्या तै पक्का करया जा लिया सै। उनका विनास त्यार सै अर उनकी बाट देखण लागरया सै।

**4** क्यूँके पणमेसर नै पाप करण आळे दुतां लग ताहीं जिब कोनी छोड्या अर उन ताहीं पताळ लोक की अंधेरै तै भरी कोठड़ीयां म्ह गेर दिया के वे न्याय के दिन लग ओड़ए पड़े रहवें।

**5** उसनै उस पुराणे संसार ताहीं भी कोनी छोड्या किन्तु नूह की उस बखत रुखाळी करी जिब अधर्मियां के संसार पै जल-प्रलय भेज्जी गयी थी। नूह उन आठ माणसां म्ह तै एक था जो जल-प्रलय तै बचगे थे। धार्मिकता का उपदेश देणीया नूह उपदेश दिया करै था।

**6** सदोम अर अमोरा जिसे नगरां ताहीं विनास का दण्ड देके राख बणा डाल्या गया ताके अधर्मी लोगां के गेल्या जो बात बित्तैगी, उनके खात्तर या एक चेतावनी ठहरै। **7** उसनै लूत ताहीं बचा लिया जो एक नेक माणस था। ओ ऊत लोगां के भून्डे आचरण तै दुखी रह्या करै था। **8** ओ धर्मी माणस उनके बिच्चाळै रहन्दे होए रोज जिसा देखे था अर सुणे था, उसतै उनके व्यवस्था रहित काम्मां के कारण, उसकी साच्ची आत्मा तड़पदी रहवै थी।

**9** इस ढाळ प्रभु नै बेरा सै के भगतां ताहीं न्याय के दिन लग किस ढाळ बचाया जावै सै अर दुष्टां ताहीं दण्ड के खात्तर किस तरियां राख्या जावै सै। **10** खास करके उन ताहीं जो आपणी पाप तै भरी प्रकृति की भून्डी वासनायां के पाच्छे चाल्लै सैं अर प्रभु की प्रभुता तै घृणा राखे सैं।

ये अपने आप पै घमण्ड करै सैं। ये महिमावान की बेजती करण तै भी कोनी डरदे। **11** जिब के ये सुर्गदूत जो शक्ति अर सामर्थ्य म्ह इन लोगां तै बड्डे सैं, प्रभु के श्यामी उन पै कोए भून्डा दोष कोनी लगादे।

**12** किन्तु ये लोग तो बिना बिचार करण आळे पशुआं के

बरगे सैं जो आपणी सहजवृति के मुताबिक काम करै सैं। जिनका जन्म ए इस करके होवै सै के वे पकड़े जावें अर मार दिए जावें। वे उन मामलयां के बिरोध म्ह बोल्लै सै, जिनके बारै म्ह वे अबोध सैं। जिस तरियां पशु मार दिए जावें सैं, उससे तरियां ए इन ताहीं भी नास कर दिया जावैगा। **13** इनै बुराई का बदला बुराई तै मिलैगा। दिन का चाँदणे म्ह भोग-विलास करणा इनै भावै सै।

ये सरम तै भरे धब्बे सैं। ये लोग जिब थारै गेल्या त्यौहारां म्ह सामिल होवै सैं तो **14** ये सारीहाण किसे इसी लुगाई की टोह म्ह रहवें सैं जिसके गेल्या व्याभिचार करया जा सके। इस ढाळ इनकी आँख पाप करण तै बाज कोनी आन्दी। ये अस्थिर लोगां ताहीं पाप के खात्तर भका लेवें सैं। इनके मन पूरी तरियां के आदी सैं। ये अभिशाप के बेट्टे सैं।

**15** सीधा-सादा राह छोड़ के ये भटक गे सैं। बओर के बेट्टे बिलाम के राह पै ये लोग चाल्लन लागरे सैं; बिलाम, जिस ताहीं कैदी की मजदूरी प्यारी थी। **16** किन्तु उसके भुण्डे काम्मां के खात्तर एक गधी, जो बोल कोनी पांदा, माणस की बाणी म्ह बोल्ली अर उस ताहीं डांटया अर फटकारया अर उस नबी के उन्माद तै भरया काम करण तै रोक्या।

**17** ये झुठे उपदेशक सूखे पाणी के स्रोत सैं तथा इसे बिना पाणी आळे बादळ सैं जिन ताहीं तूफान उड़ा ले जावै सै। इनके खात्तर गहरी अन्धकार तै भरी जंगहा पक्की करी गयी सै। **18** ये उन ताहीं जो भटके होयां तै बच लिक्ड़ण का इब भी सरूआत ए करण लागरे सैं। आपणी बेकार की घमण्ड तै भरी बातों तै उनकी भौतिक वासना तै भरी इच्छायां नै जगा के सच्चे राह तै डिगा लेवै सैं। **19** ये झुठे उपदेशक उन ताहीं छुटकारे का बचन देवें सैं। क्यूँके कोए माणस जो उस ताहीं जीत लेवै सै, ओ उससे का दास हो जावै सै।

**20** इस तरियां तै जे ये म्हारे प्रभु अर उद्धारकर्ता यीशु मसीह नै जाण लेण अर संसार के खोत तै बच लिक्ड़ण के पाच्छे भी दुबारै तै उन्ने म्ह फँस के हार गे सैं, तो उनके खात्तर उनकी या पाच्छली हालत, उनकी पहूडी हालत तै किते घणी भून्डी सै **21** क्यूँके उनके खात्तर योए आच्छा था के वे इस धार्मिकता के राह नै जाण ए नीं पाण्डे बजाय इसके के जो पवित्र आज्ञा उन ताहीं दी गयी थी, उस ताहीं जाणके उस तै मुँह फेर लेंदे।

**22** उनके गेल्या तो उससे तरियां तै ए बिती जिस तरियां के उन साच्ची कहावतां म्ह कह्या गया सै: “कुत्ता आपणी उल्टी के

धोरे ए बोहड्डे सै।” अर “एक नुवाई होई सुअरनी कीचड़ म्ह लोट लगाण कै खात्तर दुबारे बोहड़ जावै सै।”

### यीशु दुबारे आवैगा

**3** हे प्यारे ढब्बीयो, इब या दूसरी चिट्टी सै जो मैं थारै ताहीं लिक्खण लागरया सूं। इन दोन्नुआं चिट्टीयां म्ह उन बातां नै याद दुवाकै मनै थारे पवित्र हृदयां नै जगाण की कोसिस करी सै, **2** ताके थम पवित्र नबियां कै जरिये अतीत म्ह कहे गये बचनां नै याद करो अर म्हारे प्रभु अर उद्धारकर्ता के आदेशां का, जो थारे प्रेरितां कै जरिये थारै ताहीं दिए गये सैं, ध्यान राखो।

**3** सारया तै पहल्या थारै ताहीं न्यू जाण लेणा चाहिये के आखरले दिनां म्ह आपणी मर्जी पै चाल्लन आळे मखौल उडान्दे होए आवैगे **4** अर कहवैगे, “के होया उसके दुबारे आण की प्रतिज्ञा का? क्यूँके म्हारे बुजुर्ग तो मर लिये। पर जब तै सृष्टि बणी सै, हरेक बै, उससे तरियां की उसी ए चाल्ली आण लागरी सै।”

**5** किन्तु जब वे यो तान्ना मारै सैं तो वे न्यू भूल जावैं सैं के पणमेसर के बचन कै जरिये अकास युगां तै विद्यमान सै अर धरती पाणी म्ह तै बणी अर पाणी म्ह स्थिर सै, **6** अर इस्से तै उस युग का संसार जल-प्रलय तै नास हो गया। **7** किन्तु यो अकास अर या धरती जो आज अपणे बजूद म्ह सै, उससे आदेश कै जरिये अग्नि कै जरिये नास होण कै खात्तर सुरक्षित सैं। इन ताहीं उस दिन खात्तर राख्या जाण लागरया सै, जब अधर्मी लोगां का न्याय होगा अर वे नास कर दिए जावैगे।

**8** पर प्यारे ढब्बीयो! इस एक बात नै मतना भूल्लो: प्रभु के खात्तर एक दिन हजार साल के बराबर सै अर हजार साल एक दिन के जिसे सैं। **9** प्रभु आपणी प्रतिज्ञा पूरी करण म्ह वार कोनी लगान्दा। जिसा के कीमे माणस सोच्चै सैं। बल्के ओ म्हारै बाबत धीरज धरै सै क्यूँके ओ किसे भी माणस नै नास कोनी होण देणा चाहन्दा। बल्के ओ तो चाहवै सै के सारे मन फिराव कै कान्नी बडै।

**10** किन्तु प्रभु का दिन चुपक दे सी चोर की तरियां आवैगा। उस दिन एक भयंकर गर्जण कै गेल्या अकास जान्दा रहवैगा अर अकासीय पिण्ड आग म्ह बळ कै नास हो जावैगे तथा या धरती अर इस धरती पै की सारी चीज बळ जावैगी। **11** क्यूँके जब ये सारी चीज इस ढाळ नास होण नै जाण लागरी सैं तो सोच्चो थारै ताहीं किस ढाळ बनणा चाहिये? थारै ताहीं पवित्र जीवन जीणा चाहिये, पवित्र जीवन जो पणमेसर नै चढ़ाया जावै सै तथा हरेक ढाळ के उत्तम काम करने चाहिये। **12** अर थारै ताहीं पणमेसर के दिन की बाट देखणी चाहिये अर उस दिन नै ल्याण कै खात्तर कोसिस म्ह रहणा चाहिये। उस दिन कै आंदे ए अकास लपटयां म्ह बळ कै नास हो जावैगा अर अकासीय पिण्ड उस ताप तै पिंघल उठैगे। **13** किन्तु हम पणमेसर के बचन कै मुताबिक इसे नये अकास अर नयी धरती की बाट देखण लागरे सां जित धार्मिकता बसै सै।

**14** इस करके हे प्यारे ढब्बीयो, क्यूँके थम इन बातां की बाट देखण लागरे सो, पूरी कोसिस करो के प्रभु की निगाह म्ह अर शान्ति म्ह बेकसूर अर बिना कलंक पाये जाओ। **15** म्हारे प्रभु के धीरज नै उद्धार समझो। जिसा के म्हारे प्यारे बन्धु पौलुस नै पणमेसर कै जरिये दिए गये विवेक कै मुताबिक थारै ताहीं लिख्या था। **16** अपणी दूसरी सारी चिट्टीयां की तरियां उस चिट्टी म्ह उसनै इन बातां कै बाबत म्ह कह्या सै। उन चिट्टीयां म्ह कीमे बात इसी सैं जिनका समझणा ओकखा सै। अज्ञानी अर अस्थिर लोग उनके अर्थ का अनर्थ करैं सैं। दुसरे शास्त्रां कै गेल्या भी वे इसा ए करैं सैं। इसतै वे अपणे ए पैरां पै कुवाडी मारैं सैं।

**17** इस तरियां तै हे प्यारे ढब्बीयो, क्यूँके थारै ताहीं ये बात पहल्या तै ए बेरा सैं इस करके चौकन्ने रहो के थम बुराइयां अर व्यवस्थाहीन लोगां कै जरिये भटक कै आपणी स्थिर हालत तै डिग ना जाओ। **18** बल्के म्हारे प्रभु तथा उद्धारकर्ता यीशु मसीह के अनुग्रह अर ज्ञान म्ह थम आगै बढदे जाओ। इब और अनन्त बख्त लग उसकी महिमा होन्दी रहवै।

## नोट्स